

EHUko Udako Ikastaroak Euskal dialektologia

Iñaki Camino: «Hizkuntza estandarraren eta gurearen artean eskualdeko euskara dago»


'Dialektologiako hamar kontzeptu' azaldu zituen atzo EHUko irakasleak

Erredakzioa / Donostia

Euskal Herriko Unibertsitateko Filologia eta Geografia-Historia Fakultateko irakasle Iñaki Caminok *Dialektologiako hamar kontzeptu* klasea eskaini zuen atzo Euskal Dialektologia ikastaroaren barruan. Kontzeptu horiek argitzearekin bat, dialektoak aztertzeke hainbat giltzarri eskaintzen saiatu zen, bide batez euskalkiak hizpide hartuz.

ISOGLOSA, hizkerek izaten dituzten aldaketen aldi eta eremuak, hizkuntzaren dinamismoa, gizarte eta hizkuntza egituraren arteko erlazioa... Kontzeptu horiek guztiak ahotan hartuta eskaini zuen atzo hitzaldia Iñaki Caminok.

Dialektologian aurrera egiteko, besteak beste, hizkuntzaren dinamismoaz ondo jabetu behar dela esan zuen. «Hizkuntza mistoak izanez, hizkuntza bat aztertzera kontuan hartu behar dugu hizkuntza horren dinamismoa. Hizkuntza dinamismo askoren barne baitago eta dinamismo horrek ez gaitu ikaratu behar, dialektoak pertsonak komunikatzeko erabiltzen baititugu», esan zuen atzoko jardunean Euskal Herriko Unibertsitateko irakasleak.



Iñaki Camino, Euskal Herriko Unibertsitateko irakaslea, artxiboko irudi batean.

Dialektoen berdintze prozesuan, alegia dialekto lokalen galtze prozesuan, hizkuntza estandarrak dialektoak bertikalki berdintzen dituela esan zuen. «Horrek ez du esan nahi hizkeren artean harremanik dagoenik, hizkuntza estandarraren eta gurearen artean eskualdeko hizkera baitago, eta horretan lagunartekoak oso garrantzitsuak dira», azaldu zuen.

Euskalkien egungo azterketari buruz kritika bat egin zuen: «Antzinako gipuzkera aztertzen dugu eta bekatua da egungoa landu gabe uztea», esan zuen. «Bestalde,

Luzaideko euskarak berezko izaera du

ATZO euskal dialektologiari eskainitako ikastaroan tarte berezia izan zuen Nafarroako Unibertsitate Publikoko irakasle Patxi Salaberri ere. Luzaideko euskara hizpide, haren ezaugarri nagusiak nabarmendu zituen, batez ere Aizko eta Meskizeko

euskararekin alderatuz. Bi horietan euskara nafarra egiten dela esan zuen, eta Luzaiden, berriz, Iparraldekoa, Garazi aldekoa hain justu.

Bere jardunean kezka azaldu zuen, Luzaiden euskara galtzen ari den susmoa duelako.

ohitura hartu behar dugu hizkerak aztertzeaz gain, bilakabideak eremu handietan aztertzeke ere», gainera-

tu zuen. Halaber, Ipar Euskal Herriko premiak ere hizpide izan zituen atzo Caminok.

Abertzaleek onartu egin dute Euskara Biziberritzeko Plan Nagusia Legebiltzarrean eztabaidatzea

■ Eusko Jaurlaritzak komunikazio bat aurkeztuko dio Ganberari

Luis Karlos Garcia / Gasteiz

EUSKO LEGEBILTZARREKO talde abertzaleek onartu egin dute Eusko Jaurlaritzak Euskara Biziberritzeko Plan Nagusiari buruzko komunikazio bat Gasteizko Ganberari bidaltzea, parlamentarioek eztabaida dezaten aipatutako plangintza hori, oposizioak behin eta berriz eskatu bezalaxe.

Plan Nagusia Parlamentura igortzeko eskatuz PSE-EEk aurkeztutako legez besteko proposamena aho batez onetsi zuen atzo Legebiltzarreko bilkurak. Ganberako informazio iturrien arabera, EAJK, EAK eta EHk alde bozkatu zuten, oposizioko taldeek «amaigabeko ikurtzat har ez dezaten» aipatutako plangintza adostasunik gabe eta dekretu hutsez onartu zela, eta, era berean, PPK, PSE-EEK eta UAK «kolokan jar ez dezaten» Euskararen Aholku Batzordea bera ere.

Gauzak horrela, hiru talde abertzaleek «komenikotzat» ikusi dute «politikoki nahiz estrategikoki» eztabaida parlamentarioari bide egitea, are gehiago EAJK, EAK eta EHk Ganberan gehiengo bermatuta dutela gogoan izanda.

Foruko alkatea epaitu dute erreklutatze zerrenda ez bidaltzeagatik Gobernu Militarrrera

■ Zerrenda bidali zutela eta epaiketako txostenean sartu dutela dio defentsak

I. Olabarri / Bilbo

IGOR DUÑABEITIA Foruko alkatea epaitu zuten atzo Bizkaiko Probintzia Entzutegian. Fiskalak urte biko inabilitazioa eta 1.800.000 pezetako isuna (72.000 libera) eskatzen du Igor Duñabeitia-arentzat Espainiako Defentsa Ministerioari laguntza ukatzeagatik. Foruko Udalak 1997. urtean ez zuela zerbitzu militarra egitera joan behar zutenen zerrenda bidali leporatzen diote.

Hala ere, alkatearen abokatuek epailearen esku utzi zituzten agiriaren artean dago urte horretako Foruko Udalak Bizkaiko Gobernu Militarrrera bidali zuen izenen zerrenda. Alkatearen abokatuek onartu egin zuten zerrenda berandu iritsi zela Gobernu Militarrrera, baina hori arazo administratibo bat baino ez zela izan nabarmendu zuten, eta fiskalaren eskaera gehiegizkotzat jo eta Igor Duñabeitia aske uzteko eskatu zuten.

Foruko Udalak Armadari inolako laguntzarik ez emateko hartuta duen erabakiari buruz galdetu ziotenean, Igor Duñabeitiak azpimarratu zuen erabaki hori udalbatzarrik hartu zuela. Udalak duen organo nagusiak erabakitakoa bete baino ez duela egin esan zion fiskalari.

Teodoro Alvarez erreklutatze zentroko orduko buruak epailearen aurrean esan zuen Foruko Udalaren jarrearak «eragozpen txiki batzuk» baino ez zituela sortu.



Igor Duñabeitia eta abokatua, epaiketara sartu aurretik.